

# **Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata allanngortinneqarnera pillugu Inatsisartut inatsisaat (Avaleraasartuunut akitsuut)**

## **§ 1**

Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaanni nr. 11, 3. december 2012-imeersumi, Inatsisartut inatsisaatigut nr. 9, 29. November 2013-imeersukkut allanngortinneqartumi makku allanngutigitinneqarput:

**1. Inatsisip taaguutaa ima oqaasertaqassaaq:**

"Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaat."

**2. § 1, imm. 1, ima oqaasertaqassaaq:**

"Suliffeqarfiit aamma inuit avataasiorluni qaleralinniarnissamut taamatullu aamma avaleraasartoorniarnissamut pisassinneqarsimasut pisamik ilaasa, aalisarneq pillugu inatsit naapertorlugu Kalaallit Nunaanni tunitsivimmut tunisassiorfimmulluunniit tunineqartussaanngitsut landskarsimut akitsuutaannik, inatsimmi matumani aalajangersakkat naapertorlugit akiliissapput."

**3. § 2-p kingornagut qulequtaq ima oqaasertaqassaaq:**

"Qalerallit akitsuutaat"

**4. § 3, imm. 1, ima oqaasertaqassaaq:**

"Akitsuut qaleralimmut kiilumut 2,50 koruuniuvoq, takuulli imm. 2."

**5. § 3, imm. 2, punktum siulleq, ima oqaasertaqassaaq:**

"Akitsuut qaleralimmut kvartalikkaartumik aaqqiivigineqartassaaq kvartalip siuliani akitsuutip angissusia tunngavigalugu aammalu qalerallit akiisa uuliap danskit koruuninngorlugit akianut sanilliullutik allanngorarnerisa angeqqataannik."

**6. § 3-p kingornagut qulequtaq nutaaq ilanngunneqassaaq:**

"Avaleraasartuut akitsuutaat"

**7. Qulequppaap kingornagut ilanngunneqassaaq:**

**“§ 3a. Akitsuut avaleraasartuumut, angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartumut kiilumut 0,95 koruuniuvoq.**

*Imm. 2. Akitsuut avaleraasartuumut, angallat Danmarkimi, Savalimmiuni nunaniluunniit allani angerlarsimaffeqartutut nalunaarsorneqarsimasoq atorlugu pisarineqartumut kiilumut 0,95 koruuniuvoq.”*

**8.§ 7 ima oqaasertaqassaaq:**

"**§ 7.** Naalakkersuisut qalerallit akitsuutaannik akiliinnginnissamik qinnuteqaat akuerisinnaavaat, misileraalluni aalisarnissaq peqassutsimut imaluunniit inuussutissarsiornermut pingaaruteqartoq akuersissutigineqarsimappat, aammalu akiliinnginnissamik akuersinerup aningaasatigut sunniutissai annertungippata."

## **§ 2**

Inatsit 1. maj 2014-imi atortuulissaaq, atutissallunilu avaleraasartuunut 1. maj 2014-imi kingusin-nerusumiluunniit pisarineqartunut. 2014-imi aningaasanut inatsimmi kontumut pingaarnermut 24.11.26-mut oqaasertaliunneqartumi nr. 1-imi aalajangersagaq taassuma ilutigisaanik atorunnaarsinneqassaaq.

*Namminersorlutik Oqartussat, ulloq 8. juni 2014*

Aleqa Hammond

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut